

www.BibleForChildren.org

Mateo 26




Ket, sin a'nem
a awro adapen a
pista, nako sara si
Jesus sa Betania, si
babali na ni Lazaro a
pinasubli' na intaw
nin mabyay. Sin sain,
nangalap ya si Maria
nin kapiknga' litro nin
pinasyan bili nin puron banglo a
say ngaran ket nardo. Niyapros
nayti sa ayi na ni Jesus mintras
nin mampunasan nan sabot nay ayi na.
Ket inmupuop sa intiron bali a banglo.



Ket si Judas Iscariote a saya konran
labinrwan tumutumbok na ni Jesus,
nako ya konran Pupangulon
Pupadi' ta pigaw nin nikitarusan
yan ipagamet naya si Jesus
konra. Konan siin maririket
sara, ket nipapagketan ran
byan rayan kwarta.
Anaod, nangibwat
ana sin sain, nanirib
yayna si Judas
nin tyimpon
maipagamet
naya konra
si Jesus.



Ket ginwa' ran tumutumbok a
wana konra tan nisadya' raynay
pangapunan ra sa pista. Sin
kapresan ran mampangan nangalap
yan tinapay si Jesus, tan nikisalamat
ya konan Dios mi' sa simpi-simping
naya tan nitayak na konran
tumutumbok na. Wana, "Kalapen
moyayti tan kanen
moya. Siti a
lalaman ko."



Kaaram, kinalap nayay baso amain
nin arak nin ubas. Nikisalamat ya
konan Dios, mi'sa naya nin nibi
konran tumutumbok a wana,
"Sarba moyo, minom konan siti.
Sayti a daya' ko nin mama'get
nin kataratwan konan Dios.
Tumuro' li' ta pigaw
nin mapirduna a
kukasalanan
ran abaw
a tutawo."



"Simon Pedro, mangrenge' ka. Si Satanas, inaburuyan
naynan Dios a dawat nan subuken a pammemper moyo
nga'min, a say pa'sar moyo ket kapada no pipuruken a
byas tan ata' nin yakayaken. Bale', nidasal takayna,
Simon, a kai kumon nin mayegyeg a pagmamatalek mo.
Ket no sinmubli' kayna li' kongko, pagsenen mosaray
bubsat mo."



Wanan ni'bat ni Pedro kona, "Uunuren,
sisasadya' akon maipriso o mati nin kalamo' ka."
Ket wana ni Jesus kona, "Pedro, ibarita' koyti
komo, konan sitin yabi ba'yo main nin tumarang'ok
nin manok, mitlo mo ibudi' a katanda' nako."



Rinmate' sara si Jesus
itaw sa sayay lugar a
napangaranan nin
Getsemani. Wana
konran tumutumbok na,
"Mabati' kamodti. Mako
akodtaw e nin dumasal."
Wana, "Ama ko! Sa sarban
bagay ket main pakayadi'
mo nin mangwa'. Andi' moyna
kumon nin ipairangep kongko
in say dya'dya' a adapen kon
irangep. Wanin man, ambo' nin
say karabayan ko a masunor,
no kai say karabayan mo."



Kanya' nin itaw nasara nin ni'ras a grupo nin
sundalo' tan gwardya sa Timplo nin nibaki'
ran saray Pupangulon Pupadi' tan saray
Pariseo. Nagsiawit sara nin tyo' ra tan
di-armas sara. Bigra', tinaga'
nayan saya konran apostoles
a sayay katulong nan
Sangkata' gayan nin Padi' ket
naglat yan nataga' a wanan
nin tutulyan na. Ket wana ni
Jesus, "Kustoyna in!"
Gina' getan nayay tutulyan
nan katulong ket tampor
a inmanda' ya.



Dinakep raya si Jesus tan nika' raya sa bali nan
Sangkata' gayan nin Padi'. Si Pedro, tinmumbu-tumbok
ya bale' itaw ya tamo' sa
dayo'. Main nin namuor
itaw sa butlay nin
baraybay nan bali nan
Sangkata' gayan nin
Padi', mi'sa tinmekre'
saran pairangrang.
Ket nako ya nin
pairangrang nin
kalamo' ra si
Pedro.



Sin sain, main nin
aripen nadtaw nin
Sangkata'gayan
nin Padi' a siti ket
kanayon nayan sitaw si
naglatan nin tutulyan a
tinaga' na ni Pedro. Wana
kona ni Pedro, "Ambo' para
a saya ka konran na'kit kon
kalalamo' nadtaw sa pukok
nin kukayo?" Bale' nibudi' na
anamanain ni Pedro. Bigra' a
main nin tinmarang'ok nin
manok. Nibwat ya si Pedro ket
inmakis ya sa bereng nan tuloy.




Sin sain, inumdeng saran sarba a
myimbro nan Kungsiho ta i'ras raya
si Jesus kona ni Gubirnador Pilato.
Kanya' nin, tinepetan naya ni Pilato
a wana, "Si'ka paran page' a Adi'
ran Judio?" Ket ni'bat
na ni Jesus, "Nairgo
moyoyna." Sa apes na ni
Pilato nin bulusan ya si
Jesus, ket nikiirgo ya

anaet konran tutawo,
bale' nita'way ran wanra,


"Sya a ipasak sa
kudos! Ipasak ma!"




Sin wanin, nipagamet naya ni Pilato
konra si Jesus nin ika' raya
nin ipasak sa kudos. Ket saray
sundalo', nipabalatay raya kona
ni Jesus a kudos na tan nika'
rayadtaw sa lugar a mantawagen
nin Lugar nin But'ol Ulo. Say
tawag kona sa sarita' ran
Judio ket Golgota.



Itaw, nipasak raya sa kudos si
Jesus, karngan ran rwa ra et
nin tawo, saya iti sa wanan na
tan saya sa wiri.



Sin nangyadi' in bandan ugtiawroyna, ket dinmedlem
yay intiron babon luta' nin narate' a tuloy udas ta
nakasay sira' nan awro. Sawanin, nabisang
yan napiknga' a kurtina sa
Sangkasantusan nin Lugar
sa Timplo. Ket wana ni
Jesus nin nita' way nin
maksaw, "Ama, ipagamet
koyayna komo a kararwa
ko!" Kayadi' na nin
inirgoyti, nauyos
anay inanawa na.



Itaw ya si Jose a taga Arimatea,
a sayay mapagalang nin myimbro
nan Kungsiho ran Judio tan
mantuma'gan ya sa
irarate' nin pag'aadi'
nan Dios. Bana' ta
yabinayna konan
siin a awro,

pinaksaw nay
nakem na ket nako
ya kona ni Pilato
nin nikidawat yan
aburoy a kalapen
nayay bangkay na
ni Jesus.



Ket nako ya nanaliw si Jose nin
mabistan klasin abel a maputi' nin
mantawagen nin diilo, mi'sa
nikayupa' nayay bangkay
na ni Jesus nangibwat
sa kudos tan binarkot
naya nin sitin abel.
Mi'sa nipaida'
naya konan sayay


pannabunan a
kinalin bara'mon
yukib sa bato,
ket nitulin nayan
nisada' sa purta
nan pannabunan a
sayay alakin bato.



Napalabas yaytaw nin Awron
Pananadya' sa Pistan
Nipanglabas, saray
Pupangulon Pupadi' tan
saray Pariseo, nako
sara kona ni Pilato.




Wanra kona, "Gubirnador,
mapanemtem mi a wanan
sitaw a magbalu'-balo'
sin mabyay ya et a
sumubli' ya kanon
mabyay sa luob
nin tuloy awro.



Ket nako sara sa nanabunan
kona ni Jesus. Tinimbryan
rayay sada' nan pantyon
tan nipagwardyawan
raya ta pigaw nin
masigurado ran
kasa gapon
makatege' kona.



Napalabas anay Awron Painawa.
Sin parbangon nin ararem nin
Linggo, si Maria a taga
Magdala tan si kapada
nan Maria, kina' raya
nin kinikit a
nanabunan kona
ni Jesus.



Kapingmatan,
bigra' yan
rinmayon nin
maksaw.

Ket, si sayay anghil nan Dios
kinmayupa' yan nangibwat sa
langit; nitulin nayay baton
sada' nan pantyon mi' sa
naya nin tinekreatan.
Sin na'kit rayan
gwardyan sundalo',

nangingintar
sara sa li'mo ra
tan namaksir
saran natumba
sa luta'.



Ket sin wanin, wanan anghil konran
bubbayi, "Andi' kamo nin mali'mo.
Tanda' kon mantikapen moya
si Jesus nin sitaw si
nipasak sa kudos. Kasa
yaynadi ta sinmubli'
yan mabyay a bilang
sa wana komoyo sin
saytaw. Paradi ta

pigaw
nin

ma'kit moyay
nangipaidan
kona."



Ket nangapura saraynan nibwat itaw
sa nanabunan. Mali'mo sara bale'
pinasyan ririket ra. Palayo ran nako
nangibarita' konran tumutumbok
na ni Jesus. Kapingmatan sinna'
nasara ni Jesus. "Kumusta! Ani
a idya moyo?" wana konra.
Inmarak sara kona ni Jesus,
nilukob
ra

sa adapan na tan gina' getan
ray ayi na tan rinayo raya.





Sinmunor, pinaipa'kit ya konran labinsayan
tumutumbok na sin mampangan sara. Nikapuet nasara
bana' ta benged sara tan bana' ta kai rasara nin
timper a naka'kit kona kayadi' a sinmubli' yaynan
mabyay. Sin nayadi' yayna nin nikiirgo si Jesus a
Uunuren konran tumutumbok na, niyuli' yayna sa
langit ket tinmekre' ya sa pawanan nan Dios.



O', ta wanin ana a
pangangawa'nan nan Dios
kontamo nin tutawo, kanya'
nin kai naya nin nisiblet,
no kai edet, ...



... nibi naya a Anak
na nin kapagkapag ta pigaw nin si
si'numan a magmatalek kona nin Anak
na ket kai ya nin maisyay konan Dios
ta pigaw nin madusa ya, no kai edet,
magkamain ya nin anggan-angga
nin byay a iti
konan Dios.



Roma 3:23 ta sarban tawo, nagkasalanan tan
mampagkurang sa sangkaandaan a pigagawa' nan Dios.

Roma 6:23 Wanin ta say upa' nin paaripen sa kasalanan
ket say patiti tan pakaisyay konan Dios; bale' say ibi nan
Dios mangibwat sa masibulot a nakem na ket say
anggan-angga nin byay a iti kona yupa' kona ni
Uunuren tamon si Jesus a syay Cristo.

Hebreo 9:27 Niketeg nan Dios a say tawo, mati nin
mi'sa, ket sumunor a pakasintinsya konan Dios.

Efeso 2:8,9 Wanin ta say kamaungan nan Dios a
nangibwatan nin nisalba nakamo sin nagmatalek kamo
kona ni Cristo. Kai in nangibwat komoyo ta rigalo na in nin
Dios. Kai in nangibwat sa mabistan gawa' nan tawo ta
pigaw nin kasa gapon magwa' nan ipasirayo
maipa'ka' sa nikaisalba na.



Roma 10:9,10 Wanti na e: No ibari-barita' mo konran tutawo a si Jesus ket syay Uunuren mo, tan masibulot a nakem mo nin mamper a pinasubli' nayan mabyay nin Dios, maisalba ka. Anaod, sa kanakman na ket mamper yay sayay tawo ket maikwinta nan Dios a mapteg ya. Anamaet, sa pangingipatatutuo na ket ma'kit a naisalba yayna.

Juan 3:16,17 O', ta wanin ana a pangangawa'nan nan Dios kontamo nin tutawo, kanya' nin kai naya nin nisiblet, no kai edet, nibi naya a Anak na nin kapagkapag ta pigaw nin si si'numan a magmatalek kona nin Anak na ket kai ya nin maisyay konan Dios ta pigaw nin madusa ya, no kaiedet, magkamain ya nin anggan-angga nin byay a iti konan Dios. Wanin ta si Dios, kai naya nin nibaki' a Anak na iti sa mundo ta pigaw nin sintinsyawan nasaray tutawo, no kai edet, ta pigaw nin maisalba sara nin nipadalan kona.



1 Juan 5:11-13 Anaod, sayti a pammatutuo nan Dios:
Si'tamon mampemper, binyan natamoyna nin
anggan-angga nin byay a iti kona ket, si ibwatan nan
siti nin byay, si Anak na. Kanya' nin si si'numan a
naipasaya konan Anak nan Dios, main nin byay na a iti
konan Dios, bale' si saya nin kai nin naipasaya konan
Anak nan Dios, kasa kona a byay a iti konan Dios.
Man'isurat koyti nga'min komoyo nin mampagmatalek
sa ginwa' nan Anak nan Dios ta pigaw
nin matandaan moyo a main nin anggan-angga
nin byay moyo a iti konan Dios.



Mateo 26-28; Lucas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Bolinao Bible (smk) © 2012, Wycliffe Bible Translators,
Inc. All rights reserved.

<https://www.bible.com/bible/413/MAT.1>

©2024 Bible for Children, Inc.

www.M1914.org

www.bibleforchildren.org

